

Script of Morning Dogri (NSD) Bulletin 17-09-2026

आकाशवाणी

खबरां जगमोहन शर्मा कोला

1. प्रधानमंत्री नरेंद्र मोदी होर अज्ज नमीं दिल्ली दे यशोभूमि च सेमीकान इंडिया 2026 दा उद्घाटन करडन।
2. भारती जनता पार्टी प्रधानमंत्री नरेंद्र मोदी हुं'दे जन्मदिन दे मौके पर इक महीने तगर राश्ट्रव्यापी सेवा संकल्प चलाग।
3. भारत नै तथाकथित पाकिस्तान-चीन सीमा संयुक्त आयोग गी खारिज करी दित्ता ऐ।
4. अमरीका दे फेडरल रिजर्व नै महंगाई पर काबू पाने लेई 2023 दे बाद पैहली बारी अपनी प्रमुख सूद दर च बाढ़ा कीता ऐ।
5. अमरीका च प्रतिनिधि सभा नै रूस दे अधिकारिणं ते ओहदी अर्थ बवस्था गी लक्ष्य बनाइयै केई बड़े प्रतिबंध लागू करने आह्ला इक बिल पास कीता ऐ।
6. भारत ते अफगानिस्तान बश्कार 3 मैचें दी श्रृंखला दा त्रीया ते अखीरी टी-20 मैच अज्ज दिल्ली दे अरूण जेटली स्टेडियम च खेड्वा जाहग।

<><><><><><>

प्रधानमंत्री नरेंद्र मोदी होर अज्ज नमीं दिल्ली दे यशोभूमि च सेमीकान इंडिया 2026 दा उद्घाटन करडन। इस मौके पर प्रधानमंत्री उत्थे मौजूद लोकें गी संबोधित करडन। अज्जै थमां शुरू होआ'रदा त्रै रोजा सम्मेलन ते प्रदर्शनी सिलिकान टू सिस्टम्स बिल्डिंग दा इको सिस्टम विशे पर आयोजित कीती जा'रदी ऐ। एह्दे च सेमीकंडक्टर ते इलेक्ट्रानिक्स खेत्तर कन्नै जुड़ी दियां वैश्विक ते भारती कंपनियां नीति निर्माता, निवेशक, शोधकर्ता स्टार्ट अप, शिक्षण संस्थान ते विद्यार्थी हिस्सा लै'रदे न।

<><><><><><>

BJP-Seva Sankalp

प्रधानमंत्री नरेंद्र मोदी हुंदे सार्वजनिक जीवन दे 25 ब'रे पूरे होआ'रदे न। इस जात्तरा च जन सेवा कन्नै मुख्य दी सेवा दा मंत्र ते सेवा ते सुशासन प्रति लगातार प्रतिबद्धता प्रमुख रेई ऐ। इसै सोच कन्नै सरकार 2047 तगर विकसित भारत दे लक्ष्य गी हासिल करने आस्तै लगातार कम्म करा'रदी ऐ। भारती जनता पार्टी प्रधानमंत्री नरेंद्र मोदी हुंदे जन्मदिन दे मौके पर इक म्हीने तगर राष्ट्रव्यापी सेवा संकल्प चलाग। एह् अभियान नरेंद्र मोदी हुंदे 7 अक्तूबर 2001 गी गुजरात दे मुख्यमंत्री दे तौर पर सगंध लैनेदे 25 बरे पूरे होने दा बी प्रतीक ऐ।

<><><><><><>

Delhi Govt Seva Sankalp

दिल्ली सरकार प्रधानमंत्री नरेंद्र मोदी हुंदे जन्म दिन दे मौके पर अज्ज सेवा समर्पण ते जनभागीदारी कन्नै जुड़े दे 4 प्रमुख कार्यक्रम आयोजित करोग। प्रधानमंत्री मोदी हुंदे सार्वजनिक जीवन दे 25 बरे पूरे होने दे मोके पर दिल्ली सरकार अज्जै थमां इक म्हीने तगर चलने आहले सेवा संकल्प अभियान दी बी शुरूआत करोग।

<><><><><><>

PM Vishavkarma 3 Years

प्रधानमंत्री विश्वकर्मा योजना दे अज्ज त्रै ब'रे पूरे होई गे न। इस योजना तैहत 30 लक्ख लाभार्थीएं दे पंजीकरण कीते जाने दा लक्ष्य पूरा होई चुके दा ऐ। इस योजना दी शुरूआत प्रधानमंत्री नरेंद्र मोदी होरें 2023 च कीती ही। चिन्हित बवसायें च लग्गे दे रिवायती कारीगरें ते शिल्पकारें गी संपूर्ण सहायता आधुनिक उपकरण, कौशल ते बजार तगर पुज्ज ते संपर्क प्रदान करिए उंदे रिवायती कौशल गी मजबूत करना ऐ। भलेआं लौहके-लौहके ते दरमयाने दर्जे दे उद्योगें सरबन्धी मंत्रालय कोलकाता च योजना दी त्री ब'रे'गंड मनाग।

<><><><><><>

Pak China Boundary

भारत नै तथाकथित पाकिस्तान-चीन सीमा संयुक्त आयोग गी खारिज करी दित्ता ऐ। विदेश मंत्रालय दे प्रवक्ता रणधीर जायसवाल होरें आखेआ जे पाकिस्तान गी गैर कनूनी कब्जे आहले क्षेत्रें कन्नै सरबन्धत कुसै बी बवस्था च शामिल होने दा कोई हक नेई ऐ ते कन्नै गै उनें आखेआ जे इस सरबन्धे च भारत दा रूख साफ ऐ ते लगातार इक्के जनेहा रेआ ऐ। जायसवाल होरें आखेआ जे भारत-पाकिस्तान-चीन सीमा संयुक्त आयोग गी स्वीकार नेई करदा की जे एहदा कोई कनूनी आधार नेई ऐ। उनें दोहराया जे जम्मू-कश्मीर ते केंद्र शसित प्रदेश लद्दाख भारत दे अननुदृ ते अविभाज्य हिस्से हे ते म्हेशां रौहडन।

<><><><><><>

US-Fed. Reserve

अमरीका दे फेडरल रिजर्व नै महंगाई पर काबू पाने लेई 2023 दे बाद पैहली बारी अपनी प्रमुख सूद दर च बाढ़ा कीता ऐ। नमीं दर च इक चोथाई प्रतिशत दे बाढ़े दे बाद फेडरल रिजर्व दी प्रमुख दर करीब 3 इशारिया 9 प्रतिशत होई गेई ऐ। फेडरल रिजर्व दी त्रै महीने आहली रपोर्ट मूजब इस बरे इक होर बाढ़ा सूद दी दरें च कीता जाई सकदा ऐ जेहदे नै एहू दर 4 इशारिया 1 प्रतिशत तगर पुज्जी सकदी ऐ। एहदे नै समें दे कन्नै मकान, मोटर गड्डी ते क्रेडिट कार्ड लेई दोआर पर बी बधी सकदा ऐ।

<><><><><><>

US-Russia Sanctions

अमरीका च प्रतिनिधि सभा नै रूस दे अधिकारिणें ते ओहदी अर्थ बवस्था गी लक्ष्य बनाइयै कोई बड़े प्रतिबंध लागू करने आह्ला इक बिल पास कीता ऐ। एहू फैसला ऐसे समें पर लैता गेआ ऐ जिसलै रूस दे राष्ट्रपति व्लादिमीर पुतिन हारें गी युक्रेन खलाफ युद्ध जारी रखने लेई माली संसाधन-वसीलें दी लोड ऐ। इस बिल दा नां दक्खन कैरोलिना दे दिवंगत सीनेटर लिंडसे ग्राहम हुंदे नां पर रक्खेआ गेआ ऐ। इस बिल दे समर्थन च 262 सांसदें मतदान कीता।

<><><><><><>

Men's Cricket

भारत ते अफगानिस्तान बश्कार 3 मैचें दी श्रृंखला दा त्रीया ते अखीरी टी-20 मैच अज्ज दिल्ली च अरुण जेटली स्टेडियम च खेड्डेआ जाहगा। भारती टीम पैहले दवें मैच जित्तियै श्रृंखला च 2-0 दी बढ़त कन्नै श्रृंखला नां करी चुकी दी ऐ। मैच संझा साड्डे 7 बजे शुरू होग। अधिकारिक तौरा पर एहू श्रृंखला अफगानिस्तान क्रिकेट बोर्ड दी मेजबानी आहली ऐ, यानि अफगानिस्तान मेजबान ते भारत मेहमान टीम ऐ। अफगानिस्तान च सुरक्षा ते अंतरराष्ट्री

क्रिकेट दी ब्हाली कन्नै जुड़ी दिएं समस्याएं कारण अफगानिस्तान फिलहाल अपने ज्यादातर घरेलू मैच होरनें मुलखें च गै आयोजित करा करदा ऐ।

<><><><><><>

EPFO

केंद्री मंत्रिमंडल नै कर्मचारी भविष्य निधि संगठन-ई.पी.एफ.ओ आस्तै वेतन सीमा गी 15 ज्हार रपे थमां बदाइये 25 ज्हार रपे फही म्हीना करी दित्ता ऐ। मंत्रिमंडल दी बैठक मगरा मीडिया गी संबोधित करदे होई सूचना ते प्रसारण मंत्री अश्विनी वैश्व होरें आखेआ जे फैसले कन्नै 51 लक्ख थमां मते बादू कर्मचारी लाजमी ई.पी.एफ.ओ कवरेज दे दायरे च आई जाडन। एह्दे कन्नै श्रमिकें आस्तै सामाजिक सुरक्षा दा दायरा बड़ा मता बदी जाह्ग। सरकार दा सलाना खर्च करीब 11 ज्हार 339 करोड़ रपे होने दी मेद ऐ।

<><><><><><>

CBFC New Members

भारत सरकार नै केंद्री फिल्म प्रमाणन बोर्ड दा नमें सिरेआ गठन कीता ऐ। नमां बोर्ड 3 ब' रें दी अवधि जा अगले हुक्मै धोड़ी होग। इस बोर्ड च 18 मिम्बर शामिल कीते गेदे न जिंदे च मनोज जोशी, प्रीति जिंटा, पंकज त्रिपाठी, सुनील शेटी, प्रियदर्शन, रिकीकेज ते हंसराज हंस जनेह मन्ने-परमन्ने दे कलाकार ते फिल्मी हस्तियां शामिल न।

<><><><><><>

Cheetah

भारत च प्रोजेक्ट चीता दे 4 बरे पूरे होने पर मुलखै च चीतें दी गिनतरी बधियै 52 होई गेई ऐ। इंदे चा 32 चीतें दा जन्म भारत च गै होए दा ऐ। एल्लै कूनो नेशनल पार्क च 49

ते गांधी सागर सेंचुरी च 3 चीते न। प्रोजेक्ट चीता दी शुरूआत 17 सितंबर 2022 गी नामीबिया थमां ओंदे गेदे 8 चीतें कन्नै होई ही।

<><><><><><>

Search Op. Udh.

उधमपुर जिले दे मजालता इलाके च संदिग्ध गतिविधियां दिक्खे जाने मगरा सुरक्षाबलें गोलीबारी कीती। इस इलाके च पैहले गै सुरक्षा निग्गर कीती गेदी ऐ। पिछले केई दिनें थमां बरैतल खुम्बां ते आले-दोआले दे इलाकें च व्यापक तपाशी अभियान चलाया जा'रदा ऐ। हाल च संदिग्ध गतिविधिएं मगरा तजा तपाशी अभियान चलायागेआ ऐ। अधिकारिएं आखेआ जे तपाश अभियान जारी ऐ।

<><><><><><>